

Na osnovu člana 22. stav 1. i 4. Zakona o slatkovodnom ribarstvu ("Službene novine Federacije BiH", broj 64/04), federalni ministar poljoprivrede, vodoprivrede i šumarstva donosi

PRAVILNIK

O PROGRAMU I NAČINU POLAGANJA RIBARSKOG ISPITA, OBRASCU I NAČINU IZDAVANJA UVJERENJA O POLOŽENOM RIBARSKOM ISPITU I REGISTRU O IZDATIM UVJERENJIMA O POLOŽENOM RIBARSKOM ISPITU

Član 1.

Ovim pravilnikom propisuje se program i način polaganja ribarskog ispita, obrazac i način izdavanja uvjerenja o položenom ribarskom ispitu (u daljnjem tekstu: Uvjerenje) i oblik, sadržaj i način vođenja registra o izdatim uvjerenjima (u daljnjem tekstu: Registar).

Član 2.

Program za polaganje ribarskog ispita (u daljnjem tekstu: Program) obuhvata sljedeće teme:

1. zakonski propisi u sportsko-rekreativnom ribolovu;
2. gospodarenje ribljim fondom u sportsko-rekreativnom ribolovu;
3. ribe slatkih voda Federacije BiH;
4. zaštita riba, ribljih staništa i poribljavanje;
5. uticaj alohtonih vrsta riba;
6. pravila sportsko-rekreativnog ribolova (ribolovne vode, prava, obaveze i ovlaštenja ribočuvara, ribolovni pribor i alati, zabrane i lovostaj, kazne u sportsko-rekreativnom ribolovu, ribolovna društva, prava i obaveze članova i kodeks).

Okvirni sadržaji iz tema navedenih u stavu 1. ovoga člana osnov su za oblikovanje ispitnih pitanja na provjeri znanja.

Ribarski ispit (u daljnjem tekstu: ispit) polaže se pismeno rješavanjem testa.

Član 3.

Federalni sportsko-ribolovni savez (u daljnjem tekstu: Savez) izdaje Priručnik za sportsko-rekreativni ribolov kao podlogu za pripremanje ispita, a na Program i Priručnik saglasnost izdaje federalni ministar poljoprivrede, vodoprivrede i šumarstva (u daljnjem tekstu: federalni ministar).

Član 4.

Ispit se polaže pred Komisijom za ribarski ispit (u daljnjem tekstu: Komisija), koju na prijedlog Saveza imenuje federalni ministar.

Komisija se sastoji od tri člana i to:

- Predsjednika matičnog udruženja-predsjednik komisije,
- Predstavnik Federalnog ministarstva poljoprivrede vodoprivrede i šumarstva, odnosno kantonalnih ministarstava-član Komisije,
- Predstavnik Upravnog odbora Sportsko-ribolovnog saveza FBiH-član Komisije.

Član 5.

Ispit organizuje Matično sportsko rekreativno društvo uz saglasnost Sportsko-ribolovnog saveza FBiH. Sportsko-ribolovno društvo objavljuje poziv za polaganje ispita.

Član 6.

Kandidat koji želi polagati ispit podnosi pismenu prijavu matičnom sportsko ribolovnom društvu. Prijava se podnosi na obrascu koji se štampa uz ovaj Pravilnik i čini njegov sastavni dio (prilog 1).

Član 7.

Članovi komisije moraju biti stručna lica u oblasti ribarstva i sportsko rekreativnog ribolova.

Članovi komisije imaju pravo na putne troškove u skladu sa Zakonom.

Troškove polaganja ribarskog ispita u iznosu od 20 KM snosi kandidat.

Sredstva se uplaćuju na račun matičnog sportsko ribolovnog društva.

Uplaćena sredstva za polaganje ribarskog ispita raspodjeljuju se na slijedeći način:

- 75% sredstava pripada organizatoru (MSRD) za potrebe organizacije ispita i isplate putnih troškova članovima komisije i poboljšanja ribočuvarske službe na terenu.
- 25% sredstava uplatom na račun Sportsko ribolovnog saveza F BiH služi za potrebe izdavanja certifikata o položenim ribarskim ispitima te vođenju evidencije o položenim ribarskim ispitima..

Član 8.

O toku polaganja ispita vodi se zapisnik čiji je sastavni dio test kandidata i prijava (obrazac 1).

Zapisnik o polaganju ispita potpisuje komisija (sva 3 člana).

Kandidat koji je neopravdano odustao od započetog ispita smatra se da nije položio ispit.

Kandidat koji nije položio ispit stiče pravo ponovo podnijeti prijavu za polaganje ispita nakon isteka šest mjeseci od dana posljednjeg polaganja

BRISAN 31/09 Član 9.

O toku polaganja ispita vodi se zapisnik za svakog kandidata posebno, a u zapisnik se unose svi podaci od značaja za tok ispita kao i ocjena.

Zapisnik vodi sekretar Komisije.

Zapisnik potpisuje predsjednik i sekretar Komisije.

Član 10.

Ukupna ocjena uspjeha ispita je "položio" ili "nije položio".

Kandidat se ocjenjuje ocjenom "položio" ako je pokazao zadovoljavajuće znanje ispitnog gradiva, odnosno pravilno riješio 60 % testa.

Član 11.

O položenom ispitu svakom kandidatu Savez (SRS FBiH) izdaje uvjerenje na obrascu koji je štampan uz ovaj Pravilnik i čini njegov sastavni dio (prilog 2).

Podaci u obrascu Uvjerenja ispunjavaju se kompjuterski, pisačom mašinom ili rukom štampanim slovima.

BRISAN 31/09 Član 12.

Obrazac Uvjerenja iz člana 11. ovog Pravilnika sastoji se od jednog lista papira A 4 formata.

Obrazac Uvjerenja toniran je u zelenoj boji.

Podaci u obrascu Uvjerenja ispunjavaju se kompjuterski, pisačom mašinom ili rukom štampanim slovima.

Član 13.

Na obrascu uvjerenja na prvoj stranici stoji:

- Naziv organa koje izdaje uvjerenje;
- Naziv obrasca uvjerenja;
- Ime i prezime nosioca uvjerenja;
- Adresa prebivališta nosioca uvjerenja;
- Datum, mjesto i država rođenja.

Na drugoj stranici uvjerenja stoji:

- Državljanstvo;
- Broj lične karte ili broj pasoša nosioca uvjerenja;
- Datum i mjesto polaganja ispita;
- Broj uvjerenja po registru;
- J.M.B.R.;

- M.P. i potpis ovlaštenog lica.

Član 14.

Uvjerenje iz člana 8. ovog Pravilnika bez obaveze polaganja ispita izdaje se:

- Licu koji je na osnovu propisa koji su bili na snazi do stupanja na snagu Zakona o slatkovodnom ribarstvu položio ribarski ispit;
- Licu koje je položilo ispit ribarstvo na VI ili VII stepenu obrazovanja;
- Licu koje je položilo ribočuvarski ispit;
- Uvjerenje iz stava 1. ovog člana izdaje se zaključno sa 31.12.2010.godine

Član 15.

Registar o izdatim uvjerenjima po ovom Pravilniku (u daljnjem tekstu: Registar) vodi se prema obrascu registra koji je štampan uz ovaj Pravilnik i čini njegov sastavni dio. (prilog br.3)

Registar se sastoji od listova papira formata A4 koji su označeni rednim brojem i moraju biti uvezani.

Član 16.

U registar se upisuju slijedeći podaci:

- redni broj;
- serijski broj uvjerenja;
- ime i prezime nosioca uvjerenja;
- adresa prebivališta;
- JMBR;
- datum, mjesto i država rođenja;
- datum i mjesto polaganja ispita;
- ovlašteno lice.

Član 17.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-02-330/05
oktobra 2005. godine
Sarajevo

Ministar **Marinko Božić**, s. r.

